

ESTATUTOS  
DA  
FEDERACIÓN GALEGA DE ATLETISMO

# TÍTULO I

## Capítulo Primeiro: DENOMINACIÓN, DOMICILIO, OBXECTO E NATUREZA

**Artigo 1º.**– A Federación Galega de Atletismo, de agora en adiante FGA, constituída o día 27 de Marzo de 1921, é unha entidade asociativa privada que carece de ánimo de lucro, e que ten por obxecto, mediante a integración de Atletas, Técnicos–Adestradores, Xuíces, Clubes e outros colectivos interesados que se adiquen á práctica do Atletismo, o fomento, o desenvolvemento e organización con carácter exclusivo na Comunidade Autónoma de Galicia, onde ostenta, tamén con carácter exclusivo, a representación da RFEA e que ademais das atribucións de seu exerce, por delegación, funcións públicas de carácter administrativo.

**Artigo 2º.**– A FGA é unha entidade de utilidade pública, que posúe personalidade xurídica e capacidade de obrar de seu para o cumprimento dos seus fins, que se rexe pola Lei 10/1990 de 15 de Outubro e disposicións dictadas no seu desenvolvemento, polos presentes Estatutos e acordos adoptados validamente polos seus órganos, sendo de aplicación en todo aquilo que non teñan regulado as disposicións legais que correspondan con total garantía dos principios democráticos e representativos.

**Artigo 3ª.**– A FGA acata as regras do Comité Olímpico Español. Así mesmo a FGA acata as Normas Xerais da RFEA relativas a fichaxes, participación, inscricións, reclamacións de carácter técnico de competición, e calquera outra de ámbito nacional, no que non se opoña ao disposto nos Estatutos.

**Artigo 4º.**– O domicilio da FGA, establécese en Santiago de Compostela, podendo ser trasladado a outro lugar, dentro do territorio da Comunidade Autónoma de Galicia, por acordo dos dous terzos da Asamblea Xeral.

**Artigo 5º.**– A FGA non permitirá, no cumprimento dos seus fins, calquera discriminación por razón persoal, política, racial, relixiosa ou de sexo.

## Capítulo Segundo: FUNCIONS

### Artigo 6º.

1) A FGA ten como función propia fundamental a de promover, facilitar, planificar, administrar e dirixir, con carácter exclusivo, a práctica do atletismo na Comunidade Autónoma de Galicia.

2) A FGA, desempeña, respecto dos seus asociados, as funcións de tutela, control, coordinación e supervisión que lle recoñecen os presentes Estatutos, as disposicións da RFEA, da IAAF e as normas legais de carácter deportivo.

3) A FGA é a única competente, dentro da Comunidade Autónoma de Galicia para regulamentar, organizar, xestionar e controlar as competicións oficiais de atletismo.

**Artigo 7º.**– A FGA ademais das súas competencias propias de goberno, administración, xestión, organización e regulamentación do Atletismo, exerce as seguintes funcións públicas de carácter administrativo.

- a) Cualificar e organizar no seu caso as actividades e competicións de ámbito autonómico. Para estes efectos, a organización de tales competicións enténdese referida á regulación do marco xeral das mesmas, segundo se estableza na normativa federativa correspondente.
- b) A promoción xeral do atletismo en todo o territorio da Comunidade Autónoma.
- c) Colaborar coa Administración Autonómica na formación de técnicos deportivos.
- d) A prevención, control e represión do uso de substancias e grupos farmacolóxicos prohibidos e métodos non regulamentarios no deporte.
- e) Exercer a potestade disciplinaria deportiva nos termos legais, regulamentaria e estatutariamente establecidos.
- f) Executar no seu caso, as resolucións do Comité Galego de Disciplina Deportiva.
- g) Calquera outra que lle sexan atribuída pola lexislación vixente.

2º.– Os actos realizados pola FGA no exercicio das funcións públicas de carácter administrativo, son susceptibles de recurso ante a Secretaría Xeral para o Deporte da Xunta de Galicia, cando as resolucións esgotan a vía administrativa.

## Capítulo Terceiro: LICENZAS

**Artigo 8º.-** 1- Para a participación nas actividades ou competicións atléticas oficiais de ámbito Autonómico, será preciso estar en posesión de licenza expedida pola FGA ou pola RFEA segundo a seguinte condición:

Uniformidade das condicións económicas, en similar estamento e categoría, a súa contía será fixada pola Asemblea de FGA. As retribucións producidas por estes conceptos irán dirixidas prioritariamente a financiar a estrutura e funcionamento da FGA.

## TÍTULO II ÓRGANOS DE GOBERNO, REPRESENTACIÓN E ADMINISTRACIÓN

### Capítulo Primeiro: NORMAS XERAIS

**Artigo 9º.-** Os órganos de goberno e representación da FGA son os seguintes:

- a) A Asemblea Xeral e a súa Comisión Delegada
- b) O Presidente

**Artigo 10º.-** Son órganos complementarios dos de goberno e representación da FGA, para asistir ao Presidente:

- a) A Xunta Directiva.
- b) O Secretario Xeral.
- c) O Tesoureiro.

**Artigo 11º.-** Son órganos de funcionamento da FGA:

- a) O Comité Galego de Xuíces.
- b) O Comité Técnico.
- c) A Comisión de Clubes.
- d) A Comisión de Atletas.
- e) A Comisión de Adestradores.
- f) Xuíz único ou Comité de Competición.
- g) Comité de Apelación.
- h) Comité de Xurisdicción.
- i) Comité Autonómico de Atletas Veteranos.
- j) Os Comités ou Comisións que considere oportunos o Presidente.

**Artigo 12º.-** Serán órganos electivos, o Presidente, a Asemblea Xeral e a Comisión

Delegada. Os demais órganos serán designados e revogados libremente polo Presidente da FGA.

**Artigo 13º.-** Son requisitos xerais para ser membro de calquera Órgano de Goberno da FGA, sen prexuízo dos establecidos regulamentariamente, os seguintes:

- a) Ter a condición política de galego, segundo o disposto no artigo 3 da Lei orgánica 1/1981, do 6 de Abril, do Estatuto de Autonomía de Galicia.
- b) Ter acadado a maioridade.
- c) Estar en pleno uso dos dereitos civís.
- d) Non estar suxeito a corrección disciplinaria de carácter deportivo que o inhabilite.
- e) Non ter sido condenado mediante sentenza penal firme que leve anexa pena principal ou accesoria de inhabilitación absoluta ou especial para cargo público.
- f) Non estar incurso en ningunha causa de incompatibilidade establecida legalmente ou nos presentes Estatutos.
- g) Reunir os requisitos específicos propios de cada estamento deportivo.

### Capítulo Segundo: A ASEMBLEA XERAL E A COMISIÓN DELEGADA

#### Sección 1ª: Natureza, composición e réxime da Asemblea

**Artigo 14º:** A Asemblea Xeral é o órgano superior de goberno e representación da FGA, composta polo Presidente da FGA, polos representantes de Clubes, de Atletas, de Adestradores e de Xuíces.

**Artigo 15º.-** A Asemblea Xeral da FGA está integrada polos seguintes membros:

- a) O Presidente da FGA.
- b) 30 membros representantes do Estamento de Clubes.
- c) 8 membros representantes do Estamento de Atletas.
- d) 2 membros representantes do Estamento de Adestradores.
- e) 2 membros representantes do Estamento de Xuíces.

A suma de todos os membros citados constituirá o quorum total e absoluto da Asemblea Xeral da FGA

No caso de que por algún dos Estatutos non se cubra a totalidade dos postos establecidos constituirase a Asemblea cos que queden.

**Artigo 16º.-** Os membros da Asemblea Xeral, serán elixidos cada catro anos, coincidindo cos anos de Xogos Olímpicos de Inverno, mediante sufraxio libre, igual, directo e secreto, entre e polos compoñentes de cada estatuto atlético de acordo coas seguintes proporcións:

70% 16 representantes de Clubes (Catro en cada Provincia).

14 representantes de Clubes (elixidos en cada Provincia, segundo o número de licenzas).

20% 4 representantes de Atletas (un en cada Provincia).

4 representantes de Atletas (a distribuír entre cada Provincia segundo o número de licenzas).

5% 2 representantes de Adestradores (saírán elixidos os dous máis votados das catro Provincias, en ningún caso poderán ser os dous da mesma Provincia).

No caso de que os dous candidatos máis votados fosen da mesma Provincia, o segundo en número de votos será eliminado, ocupando o seu posto o que lle segue en votos doutra Provincia diferente á do que obtivese o maior número de votos.

5% 2 representantes de Xuíces (co mesmo sistema que o apartado de Adestradores).

### **Sección 2ª.- Asemblea Xeral: Clase de reunións**

**Artigo 17º.-** A Asemblea Xeral poderá reunirse:

- a) En Pleno con carácter Ordinario ou Extraordinario.
- b) En Comisión Delegada.

### **Sección 3ª.- Asemblea Xeral Ordinaria. Competencias**

**Artigo 18º.-** 1- A Asemblea Xeral en canto órgano máximo de goberno e representación da FGA pode adoptar calquera acordo ou decisión

sobre a mesma, con sometemento ás regras de competencia e procedemento.

2- A Asemblea Xeral Ordinaria terá a competencia nas seguintes materias:

- a) Aprobación do calendario deportivo, bases e regulamentos das competicións e memoria das actividades anuais.
- b) Aprobación da liquidación do Orzamento do exercicio anterior.
- c) Aprobación do proxecto de Orzamento do exercicio seguinte.
- d) Análise, e no seu caso aprobación das propostas presentadas pola Xunta Directiva e os membros da Asemblea Xeral, presentadas na forma e condicións que regulamentariamente se determinen.
- e) A aprobación do gravame ou alleación dos bens inmoebles da FGA, cando o importe da operación sexa igual ou superior ao 10% do seu orzamento ou catro millóns de pesetas. Este acordo necesitará un mínimo de 2/3 dos votantes presentes.
- f) A elección e cesamento dos membros da Comisión Delegada da Asemblea Xeral así como a provisión de vacantes que se produzan do mandato, na forma legal e regulamentariamente se determine.

As materias enumeradas baixo os apartados a), b) e c), deberán ser tratadas preceptiva e inexcusablemente unha vez ao ano en Asemblea Xeral Ordinaria.

A documentación relativa ós apartados a), b) e c) deberá ser enviada ós membros da Asemblea Xeral, polo menos, con sete días de antelación á data de celebración.

### **Sección 4ª.- Asemblea Xeral Extraordinaria: Competencias**

**Artigo 19º.-** A Asemblea Xeral reunirse en sesión Extraordinaria cantas veces sexa preciso, a iniciativa do Presidente da FGA ou da Comisión Delegada, por acordo adoptado por maioría, ou a petición dun número de membros da Asemblea Xeral non inferior ao 30% nos termos regulados regulamentariamente.

Con carácter enunciativo e non limitativo a Asemblea Xeral en sesión Extraordinaria terá as seguintes competencias:

- a) Aprobar a Convocatoria de eleccións á Asemblea Xeral, comisión Delegada e Presidente, nos termos que legal e estatuariamente estean regulados.
- b) O voto de censura ao Presidente na forma regulada nos presentes Estatutos. Este acordo precisará un mínimo dos 2/3 dos votos presentes.
- c) Decidir sobre a proposta de cambio de domicilio de FGA.
- d) Calquera outro asunto que non estea expresamente atribuído polos presentes Estatutos a outro órgano.
- e) A disolución e liquidación da FGA nos termos regulados nos presentes Estatutos.
- f) A aprobación e modificación dos Estatutos da FGA Este acordo necesitará como mínimo de 2/3 dos votos presentes.

**Sección 5ª.- Comisión Delegada da Asemblea Xeral: Competencias. Quorum para a adopción de acordos. Réxime**

**Artigo 20º.-**

1- A Comisión Delegada da Asemblea Xeral, composta por seis membros elixidos entre os Estamentos de Clubes, Atletas, AdestRADadores, e Xuíces da Asemblea Xeral, ademais do Presidente da FGA, reunirse como mínimo, unha vez cada catro meses, e terá as seguintes competencias:

- a) A Elaboración dun informe previo á aprobación do orzamento do exercicio seguinte.
- b) O seguemento da actividade atlética e xestión económica da FGA, mediante a elaboración dun informe anual á Asemblea Xeral sobre a memoria de actividades e a liquidación de contas do exercicio anterior.
- c) A modificación do calendario atlético.
- d) A modificación do orzamento.
- e) A aprobación e modificación dos Regulamentos da FGA.
- f) Autorizar o gravame ou alleamento dos bens inmobles da FGA, sempre que o importe da operación sexa inferior ao 10% do seu orzamento ou a catro millóns de pesetas. Este acordo precisará un mínimo de 2/3 dos votos presentes.
- g) A Asemblea Xeral poderá encomendar expresamente á Comisión Delegada calquera outra cuestión que non sexa competencia exclusiva da mesma.

2.- A proposta sobre os asuntos numerados baixo os apartados c), d) e e) corresponden exclusivamente ao Presidente da FGA ou ós dous terzos dos membros da Comisión Delegada.

**Artigo 21º.-** 1- A asistencia a reunións da Comisión Delegada non é delegable, e será obrigatoria. A falta de asistencia sen xustificación durante tres sesións consecutivas ou cinco alternas dun membro da Comisión Delegada ás reunións da mesma, presentarase á Asemblea Xeral para cesalo e cubrir a súa vacante se houberse lugar.

2- As vacantes que se produzan de cada estamento poderán ser substituídas anualmente por e de entre os membros da Asemblea Xeral, pertencentes ao mesmo estamento no cal se produciu a baixa.

3- Para a constitución, elección, renovación e funcionamento da Comisión Delegada da Asemblea Xeral, estarase ao disposto nos presentes Estatutos e ao que legal e regulamentariamente se determine.

**Sección 6ª.- Do Réxime das convocatorias á Asemblea Xeral e Comisión Delegada. Constitución da reunión**

**Artigo 22º.-**

1.- A Asemblea e a Comisión Delegada deberán ser convocadas coa seguinte antelación mínima respecto á data prevista para a súa celebración.

- a) A Asemblea Xeral Ordinaria 15 días naturais e a Extraordinaria 10 días naturais.
- b) A Comisión Delegada da Asemblea ha de ser convocada polo menos con sete días naturais.

2.- De atopárense reunidos, aínda que fose sen previa convocatoria, a totalidade dos membros da Asemblea Xeral ou da Comisión Delegada, por acordo unánime poderán constituírse en sesión, e en tal caso, aprobar en primeiro lugar a orde do día da reunión.

3.- Na convocatoria será preciso facer constar os puntos da orde do día, con expresión do día, hora de cada unha das dúas convocatorias e lugar de celebración da reunión. En todo caso deberá incluírse na orde do día da Asemblea Xeral a aprobación da acta anterior reunión e a designación de dous delegados escrutadores.

4.- A convocatoria realizarase mediante notificación remitida ós membros integrantes da Asemblea Xeral e Comisión Delegada.

**Artigo 23º.**– Para que as sesións da Asemblea Xeral e a Comisión Delegada queden validamente constituídas, será preciso que asistan, en primeira convocatoria, como mínimo, a metade dos seus membros de pleno dereito. En segunda convocatoria, en canto á Asemblea Xeral, quedará constituída calquera que sexa o número de asistentes, e en canto á Comisión Delegada deberán concorrer, polo menos un terzo dos seus membros e como mínimo media hora máis tarde de ambos supostos.

**Artigo 24º.**– As votacións no seo da Asemblea Xeral e Comisión Delegada da FGA, realizaranse na forma e pola orde que a Presidencia estableza, sendo esta a que ha decidir se han ser ordinarias, nominais ou secretas, se polo menos o vintecinco por cento dos asistentes solicita unha modalidade determinada, a forma de votación decidirase por maioría simple dos membros da Asemblea Xeral e Comisión Delegada. No caso de empate o voto do Presidente será de calidade.

**Artigo 25º.**– De todos os acordos adoptados na Asemblea Xeral e Comisión Delegada, redactarase acta polo Secretario das mesmas, especificando o nome das persoas que tivesen intervido e as demais circunstancias que se consideren oportunas, contido dos acordos adoptados o resultado das votacións, e, no seu caso, os votos particulares contrarios ao acordo adoptado.

Os votos contrarios ao acordo adoptado ou as abstencións motivadas eximirán a quen os omita de calquera responsabilidade derivada de tales acordos.

**Artigo 26º.**– Os acordos da Asemblea Xeral e da Comisión Delegada, serán vinculantes e de obrigado cumprimento para a totalidade dos órganos, persoas e entidades que integran a FGA e terán forza executiva a partir da data da súa adopción.

## **Sección 7ª.– Do cesamento dos membros da Asemblea Xeral e Comisión Delegada**

**Artigo 27º.**– Os membros da Asemblea Xeral e a Comisión Delegada cesarán polas seguintes causas:

- a) Por defunción.
- b) Por disolución da entidade á que representan ou non renovación da súa licenza federativa.
- c) Por expiración do mandato para o que foi elixido.
- d) Por renuncia voluntaria ou dimisión.
- e) Por incorrer en causa de inexibilidade ou incompatibilidade legal ou estatutaria.
- f) Por sanción disciplinaria imposta en forma regulamentaria que implique o cesamento no cargo que ostenta.

## **Capítulo Terceiro: O PRESIDENTE**

**Artigo 28º.**– O Presidente da FGA, que o será tamén da Asemblea Xeral, a súa Comisión Delegada e Xunta Directiva, é o órgano executivo da mesma que asume a súa alta dirección en todos os asuntos que o requiran segundo os Estatutos e os acordos dos órganos de Goberno.

**Artigo 29º.**– O Presidente terá as seguintes funcións e atribucións:

- a) Ostentar a representación legal da FGA, ante os membros integrantes da Federación e ante toda clase de autoridades, organismos, tribunais, entidades, corporacións e particulares.
- b) Convocar e presidir os órganos de goberno e representación da FGA con voto de calidade en caso de empate na adopción de acordos, e executar os mesmos, asumindo a presidencia dos devanditos órganos.
- c) Estimular e coordinar a actuación dos distintos órganos federativos.
- d) Ordenar os pagos a nome da Federación, asinando co Tesoureiro e/ou Secretario Xeral ou persoa expresamente designada polo Presidente para substituílos.
- e) Coidar de que os órganos federativos axusten a súa actuación ao disposto nestes Estatutos e nos Regulamentos que os desenvolven.
- f) Conferir poderes especiais ou xerais a Letrados, procuradores ou calquera outra persoa mandataria para que ostente a súa

representación legal, tanto en xuízo como fóra del.

- g) Convocar a Asemblea Xeral, a súa Comisión Delegada, a Xunta Directiva e os demais órganos complementarios dos de goberno, que presidirá.
- h) Nomear e cesar ós Presidentes das Delegacións.
- i) Designar ao Secretario Xeral e ao Tesoureiro.
- j) Designar e cesar ós membros da Xunta Directiva e dos demais órganos non electivos da FGA.
- k) Proponer á Comisión Delegada da Asemblea Xeral:
  - 1- A modificación do calendario deportivo
  - 2- A modificación dos orzamentos
  - 3- A aprobación e modificación dos Regulamentos
- l) Ademais todas aquelas atribucións conferidas por todos os órganos superiores de goberno e as que se deriven dos presentes Estatutos e as Leis.

**Artigo 30º.**– O Presidente será elixido cada catro anos, concidindo cos anos que se celebren os Xogos Olímpicos de Inverno, mediante sufraxio libre, igual, directo e secreto polos membros da Asemblea Xeral. Os candidatos, que poderán non ser membros da Asemblea Xeral, deberán ser presentados como mínimo polo 10% dos membros da Asemblea.

No caso de que, excepcionalmente, quede baleira a Presidencia antes de que transcorra o prazo, dos catro anos mencionados, a Asemblea Xeral procederá a unha nova elección para cubrir a devandita vacante polo tempo que falte ata a terminación do prazo correspondente ao mandato ordinario.

**Artigo 31º.**– O procedemento de elección do Presidente, axustarase ao previsto no Regulamento de Eleccións á que se refiren os Artigos correspondentes.

**Artigo 32º.**– O Presidente cesará no seu cargo:

- a) Polo cumprimento do prazo para o que resultou elixido.
- b) Polo falecemento ou incapacidade física ou mental declarada legalmente.
- c) A petición propia.

d) Por aprobación de moción de censura pola Asemblea Xeral.

e) Por ocupar cargo directivo en entidade ou Clubes suxeito á disciplina federativa ou en asociación deportiva allea ao atletismo.

f) Polas demais causas que determinen as Leis.

**Artigo 33º.**– A moción de censura ao Presidente, que será constructiva, deberá ser solicitada por un terzo dos membros da Asemblea Xeral.

A moción de censura será presentada de forma razoada ao Presidente, quen deberá convocar, con carácter extraordinario, a Asemblea Xeral, para que a mesma se reúna nun prazo máximo de 30 días naturais, coa moción como único punto da Orde do Día. A notificación desta sesión extraordinaria, será tamén con 10 días naturais, polo menos, de antelación.

De o Presidente non convocar á Asemblea Xeral, a convocatoria correspondente poderá ser solicitada á Secretaría Xeral para o Deporte da Xunta de Galicia.

A sesión da Asemblea Xeral na que se debata a moción de censura, será presidida polo membro de máis idade.

#### **Capítulo Cuarto: A XUNTA DIRECTIVA**

**Artigo 34º.**– A Xunta Directiva é o órgano colexiado de xestión da FGA así como de asistencia ao Presidente, sendo os seus membros designados e revogados libremente polo Presidente da Federación, que a presidirá.

**Artigo 35º.**– A Xunta Directiva da FGA comporase a criterio do Presidente, por un número de membros non inferior a 5 nin superior a 15, incluído el mesmo, dos que todos terán voz e voto. Non terán voto os cargos remunerados.

**Artigo 36º.**– A Xunta Directiva estará presidida polo Presidente da FGA e composta por:

- a) Un ou máis Vicepresidentes.
- b) O Secretario Xeral.
- c) O Tesoureiro.
- d) Os vocais.

**Artigo 37º.**– Os membros da Xunta Directiva que non sexan da Asemblea Xeral terán acceso ás sesións da Asemblea Xeral, co dereito a voz pero sen voto.

**Artigo 38º.**– O Presidente, Vicepresidente, Secretario Xeral e o Tesoureiro da Xunta Directiva e os Presidentes das Delegacións, non poderán ocupar cargo directivo ningún nas asociacións deportivas adicadas ao deporte atlético, salvo ao da representación que ostenten os órganos superiores de goberno. Ocupar cargos directivos noutras Federacións deportivas, por parte do Presidente ou Directivo da FGA ou Presidente de Delegación, será causa de incompatibilidade: exceptúase a Real Federación Española de Atletismo.

**Artigo 39º.**– É competencia da Xunta Directiva:

- a) Preparar as ponencias e documentos que sirvan de base á Comisión Delegada da Asemblea para que a mesma exerza as funcións que lle corresponden.
- b) Preparar as ponencias e documentos que sirvan de base á Asemblea Xeral, para que a mesma exerza as funcións que lle corresponden.
- c) Preparar ponencias e documentos á Comisión Delegada, para a aprobación dos Regulamentos internos da FGA e os relativos ás Comisións e Comités do Artigo 10 e das súas modificacións.
- d) Propoñer o traslado de domicilio da FGA dentro da Comunidade Autónoma de Galicia.
- e) A Elaboración do proxecto do orzamento da FGA para a súa presentación á Asemblea Xeral.
- f) Colaborar co Presidente na dirección económica, administrativa e deportiva da FGA e na execución dos acordos dos demais órganos colexiados superiores de goberno e representación da mesma.

**Artigo 40º.**– Os Vicepresidentes colaborarán co Presidente da FGA no desempeño dos cometidos que lles encomende e substituirano en todos os casos de ausencia ou enfermidade pola súa orde.

Os vocais da Xunta Directiva cooperarán na xestión dos asuntos que á mesma corresponden e desempeñarán as misións que se lles encomende por acordo desta ou do seu Presidente.

**Artigo 41º.**– Poderán asistir ás reunións da Xunta Directiva, se son chamados polo seu Presidente, con voz pero sen voto, os representantes dos órganos federativos que non formen parte da mesma, así como aquelas persoas

que o seu informe poida ao seu xuízo, resultar conveniente en relación co punto ou puntos determinados da Orde do Día.

**Artigo 42º.**– A Xunta Directiva reunirse, como mínimo unha vez cada catro meses. A convocatoria, que corresponde ao Presidente, deberá ser notificada ós seus membros polo menos, con 7 días naturais de antelación, salvo casos de urxencia, acompañando a Orde do Día.

As sesións convocadas en caso de urxencia, serán sempre notificadas, polo menos, con 48 horas de antelación.

**Artigo 43º.**– A validez das reunións da Xunta Directiva, requirirán que concorran en primeira convocatoria a maioría dos seus membros, e en segunda, un terzo dos mesmos. Os seus acordos tomaranse por maioría.

**Artigo 44º.**– Os membros da Xunta Directiva cesarán:

- a) Por defunción.
- b) A petición propia.
- c) Revogación do nomeamento por parte do Presidente.
- d) Por expiración do prazo de mandato do Presidente da FGA.
- e) Incorrer en causa de inellexibilidade.
- f) Incorrer nunha das causas de incompatibilidade cando non renuncién á actividade ou cargo incompatible.

## **Capítulo Quinto: O SECRETARIO XERAL**

**Artigo 45º.**– O Secretario Xeral da FGA, que vén sendo tamén o da Asemblea Xeral, Comisión Delegada, da Xunta Directiva e dos demais Órganos, Comités e Comisións da FGA asistirá ao Presidente da FGA en todas as actividades propias do seu cargo.

**Artigo 46º.**– Ao Secretario Xeral, correspóndelle exercer as funcións de federatario e asesor da FGA, a preparación e despacho material dos asuntos así como a dirección e organización das funcións administrativas. Asumirá a xefatura do Persoal, sen prexuízo das facultades de Delegación que en tal sentido lle corresponda.

**Artigo 47º.**– Ao Secretarío Xeral, como Secretario nato dos Órganos, Comisións e

Comités da F.G.A, que asisite ás reunións con voz pero sen voto, salvo que pertenza de pleno dereito ós mesmos, correspóndelle:

- a) Informar verbalmente ou por escrito, contestando ás consultas que se lle fagan sobre os asuntos pendentes nos órganos da FGA e dos que forma parte e das reunións que celebren os distintos órganos Federativos.
- b) Redactar acta de todos os acordos e unha vez aprobados, asinar co VºBº dos respectivos Presidentes e pasalos ós libros correspondentes.
- c) Expedir as certificacións da FGA.
- d) Coordinar a actuación dos distintos órganos da FGA.
- e) Emitir os informes que lle soliciten.
- f) As funcións que lle encomenden as normas regulamentarias da FGA.
- g) Custodiar os libros de Actas e Rexistros da FGA.
- h) Remitir á Secretaría Xeral para o Deporte da Xunta de Galicia, actas das reunións da Asemblea Xeral e da Comisión Delegada, no prazo de 15 días, a partir da celebración.

O Secretario Xeral poderá delegar o exercicio das súas funcións noutros funcionarios da FGA ou entre os membros dos Órganos, Comisións e Comités, se fose preciso, ou no caso de ausencia ou enfermidade.

### **Capítulo Sexto: O TESOUREIRO**

**Artigo 48.-** Ao Tesoureiro da FGA, correspóndelle

- a) Gardar os fondos federativos e ter ao día a contabilidade e vixiar por ela, axustada ás normas de adaptación do Plano Xeral de Contabilidade ás Federacións Deportivas.
- b) Custodiar os libros e documentos relativos á contabilidade da FGA vixiando a súa exacta levanza.
- c) Coidar de que os pagos que ordee o Presidente correspondan cos gastos autorizados no Orzamento.
- d) Cobrar cantidades e asinar os recibos correspondentes.
- e) Elaborar o anteproxecto do orzamento para a súa análise e aprobación pola Xunta Directiva e Asemblea Xeral e confeccionar o Balance

con especificación e desglose de gastos e retribucións.

- f) Exercer a inspección económica da Federación proponendo medidas disciplinarias en caso de infracción.

### **Capítulo Sétimo: O DIRECTOR TÉCNICO**

**Artigo 49º.-** Ao Director Técnico correspóndelle exercer a dirección e organización das funcións técnicas da FGA.

O Director Técnico asistirá á Xunta Directiva e Asemblea Xeral, con voz, pero sen voto, salvo que pertenza de pleno dereito ás mesmas.

Ao Director Técnico correspóndelle:

- a) Realizar propostas de actividades, a desenvolver pola F.G.A, tales como: calendario de competicións, concentracións, proxecto de promoción, cursos de reciclaxe e formación de técnicos.
- b) Elaborar as normas técnicas das competicións, incluídas as propias das Delegacións.
- c) Seleccionar ós atletas das distintas seleccións autonómicas.
- d) Elexir ós Técnicos que integrarán a Comisión Técnica da FGA que presidirá.
- e) Informar á Xunta Directiva, Comisión Delegada e Asemblea Xeral sobre o desenvolvemento das actividades que se atopen baixo a súa dirección.

### **Capítulo Oitavo: AS COMISIÓNS E COMITÉS**

**Artigo 50º.-** As Comisións e Comités rexeranse polo disposto nestes Estatutos e os seus regulamentos respectivos, propostos polos membros de cada un deles, e presentados polo Presidente da FGA á Comisión Delegada para a súa aprobación. Estes regulamentos regularán tanto os cometidos e o funcionamento da Comisión ou Comité como os dereitos e obrigas dos membros de cada estamento.

**Artigo 51º.-** As Comisións e Comités compoñeranse de : Un Presidente e tres Vocais, como mínimo e sete como máximo, nomeados polo Presidente da FGA

**Artigo 52º.-** As Comisións e Comités reuniranse con carácter ordinario, polo menos,

unha vez ao ano, podendo facelo con carácter extraordinario se son convocados polo seu Presidente ou á proposta da metade máis un dos seus Vocais.

**Artigo 53º.**– As Comisións e Comités consideraranse validamente constituídos se foron convocados polo seu Presidente con, polo menos, 48 horas de antelación e asisten a metade máis un dos seus compoñentes.

Quedarán, non obstante, validamente constituídos, aínda que non se tivesen cumprido os requisitos de convocatoria, se concorren todos os seus membros e así o acordan por unanimidade.

**Artigo 54º.**– As Comisións e Comités son órganos consultivos da FGA e informarán á Xunta Directiva de todos os acordos

Así mesmo, as Comisións e Comités poderán formular propostas á Xunta Directiva para a súa consideración pola Asemblea Xeral.

**Artigo 55º.**– A previsión de gastos ordinarios para o desenvolvemento das súas actividades formarán parte do orzamento xeral da FGA Os gastos extraordinarios deberán seren aprobados pola Comisión Delegada da FGA, previa a correspondente proposta razoada das respectivas Comisións e Comités á que se acompañará informe do Tesoureiro da FGA.

### **Capítulo Noveno: NORMAS XERAIS DE FUNCIONAMENTO**

**Artigo 56º.**– En todas as reunións dos órganos de Goberno, Representación e Administración da FGA cada membro terá dentro do Organismo en que forme parte voz e voto, con excepción dos supostos que se establecen nos presentes Estatutos.

Os acordos serán adoptados, como regra xeral, por maioría simple, salvo naqueles casos en que sexa precisa maioría cualificada, de conformidade cos presentes Estatutos.

**Artigo 57º.**– As decisións dos órganos da FGA surtirán efecto dende o día seguinte á súa notificación, salvo disposición expresa en contra.

**Artigo 58º.**– De todos os acordos dos órganos colexiados da FGA, redactarase acta polo secretario do órgano do que se trate,

especificando o resultado da votación e, no seu caso, os votos particulares contrarios ao acordo adoptado e cantas circunstancias se consideren oportunas.

Os votos contrarios ao acordo adoptado ou as abstencións motivadas eximirán das responsabilidades que puidesen derivarse, no seu caso, dos acordos dos órganos colexiados.

Todos os acordos dos órganos superiores colexiados de goberno e representación da FGA serán públicos, salvo cando os mesmos decidan, excepcionalmente o contrario, por unha maioría de tres cuartas partes dos seus membros.

## **TÍTULO III A XUNTA XESTORA**

**Artigo 59º.**– De quedar vacante o cargo de Presidente antes da finalización do seu mandato natural, constituírase unha Xunta Xestora, composta polos membros da Xunta Directiva, co obxecto de exercitar as facultades propias da Presidencia de forma interina e para convocar eleccións, seguindo as prescricións do Regulamento electoral, no prazo máximo de trinta días. A Xunta Xestora designará, de entre os seus membros, a un Presidente e os seus acordos reflectiranse no correspondente libro de actas da FGA.

Se os membros da Xunta Directiva non quixesen facerse cargo desta misión deberán dimitir dos cargos que ostenten e asumir tal cometido, a título de Xunta Xestora, os membros da Comisión Delegada.

Realizadas as eleccións, o novo Presidente terá un mandato coa duración igual ao tempo que reste por cumprir ao seu predecesor, transcorrido o cal deberán convocarse novas eleccións.

# TÍTULO IV

## AS ELECCIÓNS Á ASEMBLEA XERAL, Á PRESIDENCIA E Á COMISIÓN DELEGADA

### Capítulo Primeiro: NORMAS XERAIS

**Artigo 60º.**– Son órganos electivos O Presidente, a Asemblea Xeral e a súa Comisión Delegada.

**Artigo 61º.**– Cada catro anos, coincidindo cos anos anteriores dos Xogos Olímpicos de Inverno, a Xunta Directiva da FGA convocará as eleccións á Asemblea Xeral constituíndose de inmediato en Xunta Xestora.

**Artigo 62º.**– O Regulamento de eleccións á Asemblea Xeral , á Presidencia e á Comisión Delegada haberá de regular as seguintes cuestións:

- a) Circunscricións electorais e número de representantes de cada estamento por cada unha delas.
- b) Calendario electoral.
- c) Censo electoral.
- d) Composición, competencias e funcionamento da Xunta Electoral.
- e) Requisitos para a presentación e proclamación de candidatos.
- f) Procedemento de resolución de conflitos e reclamacións.
- g) Ubicación, composición, competencias e funcionamento das mesas electorais.
- h) Posibilidade de recursos electorais.
- i) Elección de Presidente.
- j) Elección da Comisión Delegada da Asemblea.
- k) Voto por correo para a elección dos membros da Asemblea, non podendo utilizarse este sistema para a elección de Presidente ou Comisión Delegada.

O Regulamento de Eleccións á Asemblea Xeral, á Presidencia e á Comisión Delegada, deberá ser aprobado pola Asemblea Xeral, a proposta da Xunta Directiva da FGA.

Posteriormente deberá someterse á aprobación da Secretaría Xeral para o Deporte da Xunta de Galicia.

### Capítulo Segundo: CIRCUNSCRICIÓN E CENSOS ELECTORAIS

#### Circunscricións electorais

**Artigo 63º.**– Para os estamentos de Clubes e Atletas a circunscrición electoral será a Provincia. Para os estamentos de Adestradores e Xuíces a circunscrición electoral será única.

**Artigo 64º.**– Compoñerán o censo de Clubes, tendo dereito a votar e a seren elixidos, dentro da circunscrición electoral por onde nese momento teñan o seu domicilio social, todos os Clubes debidamente rexistrados no rexistro de Clubes da Secretaría Xeral para o Deporte da Xunta de Galicia, ata a data da convocatoria das eleccións, e telo estado, polo menos durante a tempada anterior, así como ter participado igualmente durante a tempada anterior en competicións oficiais.

Consideraranse Clubes a efectos electorais, os que cumpran os seguintes requisitos:

- a) Ter, como mínimo 25 licenzas de atletas durante a tempada anterior e na que se celebren eleccións.
- b) Ter realizado os seus atletas un número de actuacións individuais en probas oficiais non inferior a 150, efectuadas a tempada anterior á data na que se celebren as eleccións.

**Artigo 65º.**– Compoñerán o censo de Atletas tendo dereito a votar e seren elixidos dentro da circunscrición electoral por onde nese momento dispoñan de licenza federativa, todos os atletas maiores de 18 anos, que dispoñan de licenza federativa na tempada e tiveran polo menos na anterior, aínda que tivese sido por outra circunscrición, así como ter participado igualmente durante a tempada anterior en competicións oficiais.

**Artigo 66º.**– Compoñerán o censo de Adestradores, tendo dereito a votar e seren elixidos, dentro da circunscrición electoral Única, todos os adestradores en activo que formen parte de Comités Técnicos. Directivos da FGA ou de Delegación, con titulación de Adestrador na E.N.E. ou da FGA cunha antigüidade polo menos dun ano ao día da Convocatoria das Eleccións á Asemblea Xeral.

**Artigo 67º.**– Compoñerán o censo de Xuíces, tendo dereito a votar e seren elixidos, dentro da Circunscrición electoral Única todos os xuíces con licenza en vigor, cunha antigüidade de polo menos un ano ao día da Convocatoria das Eleccións á Asemblea Xeral, que tiveran actuado, en Competicións Oficiais durante a tempada anterior, ou que sexan membros dalgún Órgano de Goberno, representación ou funcionamento da FGA ou as súas Delegacións.

### **Capítulo Terceiro: A XUNTA ELECTORAL**

#### **Artigo 68º.**–

- a) A Xunta Electoral estará composta por catro membros. UN de Cada un dos Estamentos pertencentes á Asemblea anterior, Clubes, Atletas, Adestradores e Xuíces, mediante sorteo público ante Notario ou ante a Asemblea Xeral. Designaranse así mesmo os membros suplentes, en igual número e condición para os titulares.
- b) De entre os membros designados sairá o Presidente que será o , de máis idade e actuará como Secretario o Secretario da FGA, con voz pero sen voto.
- c) Os membros da Xunta Electoral non poderán figurar como candidatos ós cargos de representación electa da Asemblea e a Presidencia da FGA.
- d) A Xunta electoral terá competencia para coñecer e resolver as incidencias que se produzan sobre o Censo Electoral, presentación e proclamación de candidatos, proclamación de membros da Asemblea Xeral e Comisión Delegada e do Presidente da FGA así como a decisión de calquera outra cuestión que afecte directamente á celebración das eleccións e ós seus resultados.
- e) As decisións da Xunta Electoral son executivas e formaranse por maioría de votos. Nos casos de empate, o voto do Presidente terá carácter dirimente.
- f) As impugnacións contra os acordos da Xunta Electoral ante o Comité Galego de Disciplina Deportiva, non suspenderán a súa eficacia.
- g) Unha vez concluído o proceso electoral da Asemblea Xeral do Presidente da FGA e da Comisión Delegada, a Xunta Electoral disolverase.

### **MESAS ELECTORAIS DAS CIRCUNSCRICIÓN ELECTORAIS**

**Artigo 69º.**– Para a elección dos distintos estamentos da Asemblea, constituirase unha mesa electoral en cada Delegación, e os seus membros non poderán seren candidatos á Asemblea Xeral, axustándose no seu funcionamento ás normas regulamentarias que no seu momento se establezan.

### **RECURSOS**

**Artigo 70º.**– As reclamacións realizaranse directamente á Xunta Electoral e contra o que esta decida cabe o recurso ante o Comité Galego de Disciplina Deportiva.

**Artigo 71º.**– No caso de empate para a elección de Representantes á Asemblea e á Comisión Delegada, establécese o seguinte procedemento.

- a) PARA REPRESENTANTE DE CLUBES. Terá prioridade o que dispoña de maior número de licenzas na tempada anterior.
- b) PARA REPRESENTANTES DE ATLETAS. Terá prioridade o atleta en disposición de licenza federativa máis antiga.
- c) PARA REPRESENTANTES DE ADESTRADORES. Terá Prioridade o adestrador en disposición de licenza da ENE ou da FGA máis antiga.
- d) PARA REPRESENTANTES DE XUÍCES. Terá prioridade o xuíz en disposición de licenza de xuíz máis antiga.

### **Capítulo Cuarto: A PRESIDENCIA**

**Artigo 72º.**– Poderá ser elixido Presidente a persoa física que reúna as condicións establecidas no artigo 13 dos presentes Estatutos, salvo o apartado g).

A votación será libre, igual, secreta e directa, non admitíndose o voto por correo, nin por delegación de persoas físicas.

Será elixido Presidente o candidato que obteña a maioría absoluta dos votos emitidos. No caso de que ningún candidato acade esta maioría procederase a unha segunda votación entre os dous candidatos máis votados, resultando elixido o que obteña a maioría dos votos.

No suposto de que se presentase un só candidato non se efectuará votación, sendo proclamado Presidente o único candidato.

**Artigo 73º.**– Reunida a Asemblea Xeral e unha vez acreditados os seus membros ante a Xunta Electoral, esta constituirá a Mesa Electoral, que presidirá as súas sesións e estará composta polo membro elixido, por sorteo, de entre os presentes de cada un dos diferentes Estamentos representados, que non sexan candidatos, sendo Presidente o máis vello deles, e o seu voto será dirimente en caso de empate na toma de acordos da Mesa Electoral, actuando como Secretario da mesma o membro máis novo da Mesa.

### **Capítulo Quinto: A COMISIÓN DELEGADA**

**Artigo 74º.**– A Comisión Delegada da Asemblea Xeral da FGA estará composta por 6 membros (máis o Presidente da FGA) elixidos por e entre os compoñentes de cada un dos Estamentos da mesma (15% dos membros da Asemblea Xeral).

A composición da Comisión Delegada será a seguinte:

- O Presidente da FGA
- 3 Clubes
- 1 Atleta
- 1 Adestrador
- 1 Xuíz

**Artigo 75º.**– Os Censos Electorais para a elección da Comisión Delegada da Asemblea Xeral estarán constituídos en cada estamento, por todos os membros da Asemblea Xeral que teñan sido proclamados como tales pola Xunta Electoral.

**Artigo 76º.**– Cada un dos membros electos da Asemblea Xeral poderá ser candidato para formar parte da Comisión Delegada da Asemblea Xeral, en representación do seu estamento.

**Artigo 77º.**– Serán elixidos membros da Comisión Delegada os que obteñan o número máis elevado de votos por cada Estamento ata completar ós correspondentes membros por cada un deles.

No caso de empate entre os candidatos do Estamento de Clubes, sairá elixido o Club que tivese maior número de licenzas na tempada

anterior. No caso de empate entre os candidatos do Estamento de Atletas, sairá elixido o atleta con licenza federativa máis antiga. Para o Estamento de Adestradores, o de título máis antigo da E.N.E. ou da FGA Para o de Xuíces o de licenza de xuíz máis antiga.

No caso de non resolverse o empate coa aplicación das normas anteriores, resolverase en todos os casos a favor do de máis idade.

## **TÍTULO V OS CLUBES, ATLETAS, ADESTRADORES, XUÍCES E OUTROS COLECTIVOS**

**Artigo 78º.**– Os Clubes, atletas, adestradores, xuíces e outros colectivos, integraranse a petición propia, na FGA, a través da Delegación que lles corresponda, pola súa situación xeográfica e o seu domicilio legal, sempre que se axusten á lexislación vixente e se comprometan a cumprir os Estatutos e Regulamentos da FGA e a someterse á autoridade dos órganos federativos, en relación coas materias da súa competencia.

**Artigo 79º.**– Para a autorización ou denegación da integración doutros colectivos na FGA, terase en conta os seguintes criterios:

- a) O interese deportivo do colectivo para o desenvolvemento do Atletismo.
- b) A existencia do correspondente recoñecemento legal da actividade.
- c) A aprobación pola Asemblea Xeral a proposta da Xunta Directiva co quorum esixido para a modificación de Estatutos.

A integración efectuarase a petición propia cos mesmos criterios e requisitos que para os restantes colectivos, coas particularidades que lles estime propias a Asemblea Xeral ou se establezan regulamentariamente.

**Artigo 80º.**– A integración na FGA producirase mediante concesión por parte desta da correspondente licenza federativa. A devandita concesión será acordada pola Xunta Directiva da Delegación a que corresponda. A súa denegación que haberá de ser motivada, será recorrible ante a Xunta Directiva da FGA

**Artigo 81º.**– Todos os membros da FGA teñen o dereito a recibir a tutela da mesma con respecto ós seus intereses deportivos lexítimos, así como o de participar nas súas actividades, e no funcionamento dos seus órganos, de acordo cos presentes Estatutos, e cos Regulamentos internos daquela.

Os membros da FGA, teñen á súa vez, o deber de acatar os acordos dos seus órganos, sen prexuízo de recorrer ante as instancias federativas competentes, e no seu caso, ante a Comisión de arbitraje que no seu momento se estableza, e no seu defecto o que resolva ao respecto o Organismo competente da Xunta de Galicia.

Os Clubes quedan obrigados a facilitar á FGA a asistencia dos seus atletas ás convocatorias que han ter lugar para formar parte das distintas seleccións galegas. Así mesmo os atletas quedan obrigados a participar (salvo lesión ou outra causa xustificada,) en todas as convocatorias de seleccións galegas.

## TÍTULO VI

### Capítulo Primeiro: O RÉXIME ECONÓMICO

#### O PATRIMONIO E OS RECURSOS ECONÓMICOS

**Artigo 82º.**– O Patrimonio da FGA está integrado polos bens e dereitos que lle corresponden na súa titularidade.

**Artigo 83º.**– Os recursos económicos da FGA están constituídos por:

- a) As subvencións ordinarias ou extraordinarias da Xunta de Galicia e da RFEA
- b) As subvencións e donativos doutros organismos oficiais, entidades ou particulares.
- c) As herdanzas, legados e doacións que se lle otorguen.
- d) Os avais feitos efectivos, cando non proceda regulamentariamente a súa anulación.
- e) As cotas e dereitos que se aproben pola Asemblea Xeral, así como os recargos de mora e as multas ou calquera outra sancións de carácter pecuniario.

- f) As cotas de amortización de anticipos e préstamos concedidos pola Federación con cargo ós seus recursos: as rendas de inmobles e dos valores da súa carteira, xuros de conta corrente e produtos de alleacións de bens adquiridos con recursos propios.
- g) Os froitos, rendas e xuros dos seus bens patrimoniais.
- h) Préstamos e créditos que se lle concedan.
- i) Os beneficios que produzan os actos deportivos que organice.
- j) Os beneficios que produzan as actividades que desenvolva.
- k) Calquera outro tipo de retribución que non se opoña ao propio carácter da FGA.

### Capítulo Segundo: O ORZAMENTO

**Artigo 84º.**– A vida económica da FGA axustarase ao orzamento que se aprobe na Asemblea Xeral. A administración do orzamento responderá ao principio de caixa única, debendo adicar as retribucións de seu de forma prioritaria ós seus gastos de estrutura. Para estes efectos a Xunta Directiva presentará anualmente á Asemblea Xeral Ordinaria o oportuno proxecto. Ao devandito proxecto acompañarase:

- a) O estado de diferenza en relación co orzamento vixente e Memoria explicativa do mesmo.
- b) O avance da liquidación do orzamento do ano.

**Artigo 85º.**– Os proxectos do orzamento presentaranse nivelados e clasificados por capítulos, artigos e conceptos. As partidas autorizadas no orzamento de gastos teñen carácter limitativo e polo tanto, non poderán acordarse gastos que excedan das previsións.

**Artigo 86º.**– A aprobación de gastos e ordenación de pagos corresponderá ao Presidente da FGA

Os actos de disposición de bens inmobles, concerto de préstamos, emisión de títulos transmisibles de débeda e parte alicuota patrimonial, precisarán a aprobación da Asemblea Xeral Ordinaria, requirindo o voto favorable dos 2/3 dos asistentes.

**Artigo 87º.**– O saldo final do exercicio dos orzamentos liquidados figurará no seguinte Orzamento ordinario.

## **Capítulo Terceiro: O BALANCE E CONTABILIDADE**

**Artigo 88º.**– A Xunta Directiva presentará o Balance para a súa aprobación pola Asemblea Xeral Ordinaria, con suficiente especificación de partidas e dentro deses conceptos concretos de modo que se traduza non só o déficit, superávit ou equilibrio no seu conxunto, senón tamén o das diversas partidas e conceptos.

**Artigo 89º.**– Pola FGA levaranse os libros de contabilidade de aplicación ao sistema oficial contable, así como os de carácter auxiliar que estimen oportunos, axustándose ás normas de adaptación de Plano Xeral de Contabilidade co fin de que poida coñecerse en calquera momento o estado de contas.

Nos libros de Contabilidade figurarán tanto o Patrimonio como os dereitos e obrigas, retribucións e gastos con especificación da orixe daqueles e o destino destes.

**Artigo 90º.**– Os fondos depositaranse necesariamente en conta corrente, nun establecemento bancario ou caixa de aforros, a nome da FGA Non obstante poderá conservarse en caixa as sumas que, dentro do límite que direccionalmente sinala o Presidente, se consideren precisas para atender pequenos gastos.

As disposicións de fondos con cargo ás devanditas contas correntes, deberán autorizarse por dúas sinaturas de entre as do Presidente e as persoas autorizadas por el mesmo.

## **TÍTULO VII O RÉXIME DOCUMENTAL**

**Artigo 91º.**– A FGA haberá de levar polo menos, ademais dos correspondentes libros de contabilidade e auxiliares ós que se refire o Artigo 89 dos presentes Estatutos, os correspondentes de Rexistro de Delegacións de Rexistro de Clubes, de Actas e Inventario de bens mobles e inmobles.

**Artigo 92º.**– O libro de Rexistro das Delegacións deberá reflectir as denominacións das mesmas, ámbito territorial, o seu domicilio e os nomes e apelidos dos cargos de representación

con especificación da datas de toma de posesión e cesamento dos mesmos.

**Artigo 93º.**– Nos libros de Actas consignaranse as reunións que celebre a Asemblea Xeral, a Comisión Delegada, a Xunta Directiva, e demais órganos colexiados, con expresión da data, asistentes, asuntos tratados e acordos adoptados. As actas serán suscritas en todo caso polo Presidente e o Secretario.

**Artigo 94º.**– Os libros federativos quedarán custodiados no domicilio da FGA a disposición dos membros integrados nela, para o seu exame ou consulta.

## **TÍTULO VIII O RÉXIME DISCIPLINARIO**

**Artigo 95º.**– Constituída a organización deportiva da FGA, en base á afiliación voluntaria dos seus compoñentes, todos eles recoñecen a súa disciplina e quedan obrigados a acatar as decisións dos seus órganos disciplinarios que deberán actuar de acordo cos Estatutos e Regulamentos que se desenvolvan, podendo impugnalas a través dos recursos que legalmente procedan.

**Artigo 96º.**– Son órganos disciplinarios da FGA:

- a) O Xuíz Único ou Comité de Competición.
- b) O Comité de Apelación.

**Artigo 97º.**– Todo o relativo ao réxime disciplinario da FGA, tipificación de faltas e sancións, competencias dos órganos disciplinarios da FGA e normas de procedemento será establecido regulamentariamente, de conformidade co disposto nas disposicións legais vixentes.

**Artigo 98º.**– Fronte os actos e acordos de carácter disciplinario ou dos órganos da FGA os seus membros poderán acudir, toda vez esgotados os recursos federativos, ao Comité Galego de Disciplina Deportiva da Xunta de Galicia.

## TÍTULO IX A CONCILIACIÓN EXTRAJUDICIAL

**Artigo 99º.**– As cuestións litixiosas de natureza xurídico deportiva, expostas ou que poidan expoñerse entre os Atletas, Técnicos-Adestradores, Xuíces, Clubes e demais partes interesadas, poderán seren resoltas mediante a aplicación de fórmulas específicas de conciliación ou arbitraje, nos termos e baixo as condicións que a lexislación correspondente estableza sobre da materia.

**Artigo 100º.**– Para estes efectos a FGA establecerá regulamentariamente o sistema de conciliación ou arbitraje.

O convenio arbitral formalizarase por escrito e no mesmo, expresarase a renuncia á vía xudicial e a obriga das partes de cumprir a decisión de arbitraje nos termos que resulten de aplicación, de conformidade coa lexislación correspondente.

## TÍTULO X A MODIFICACIÓN DOS ESTATUTOS

**Artigo 101º.**– Os Estatutos da FGA unicamente poderán seren modificados por acordo da Asemblea Xeral, previa inclusión expresa na orde do día. Acompañarase á convocatoria o texto da modificación.

**Artigo 102º.**– A proposta de modificación dos Estatutos á Asemblea Xeral poderá ser realizada:

- a) Por unha cuarta parte dos membros da Asemblea Xeral.
- b) Pola Comisión Delegada.
- c) Pola Xunta Directiva.
- d) Por tres cuartas partes dos membros de un dos colectivos dos estamentos da Asemblea Xeral, sempre que se trate de artigos que afecten directamente ao devandito estamento.

**Artigo 103º.**– Aprobada a modificación dos Estatutos, esta entrará en vigor a partir do momento no que sexa ratificada polo Organismo competente da Xunta de Galicia.

## TÍTULO XI DISTINCIÓNS

**Artigo 104º.**– Para premiar os méritos relevantes na orde deportiva, contraídos por cantas persoas, entidades e Clubes estean relacionados co deporte atlético, ben sexan nacionais ou estranxeiros, a FGA poderá outorgar recompensas honoríficas que distinguan o labor que en pro do atletismo se queira premiar.

Estableceranse regulamentariamente a clase de recompensas, os méritos precisos para a súa consecución e o relativo á súa solicitude e concesión.

## TÍTULO XII DISOLUCIÓN E LIQUIDACIÓN DA FGA

**Artigo 105º.**– A FGA disolverase:

- a) Por acordo dos dous terzos dos votos da totalidade dos membros da Asemblea Xeral, ratificada polo Organismo competente da Xunta de Galicia.
- b) Pola revogación do seu recoñecemento polo Organismo competente da Xunta de Galicia.
- c) Por resolución xudicial firme.
- d) Polas demais causas que determinen as Leis.

**Artigo 106º.**– Unha vez acordada a disolución da FGA procederase á liquidación do patrimonio da mesma.

Para tal fin, a Asemblea Xeral deberá elixir unha comisión liquidadora que constará de sete membros, con idénticos criterios de proporcionalidade e elección da Comisión Delegada.

A devandita comisión liquidadora someterá a proposta de liquidación á aprobación da Asemblea Xeral, que se levará a efecto por maioría simple dos seus membros.

**Artigo 107º.**– Unha vez producida a liquidación, o patrimonio neto será destinado ós fins de carácter deportivo que determine o Organismo competente da Xunta de Galicia.

# **TÍTULO XIII**

## **ESTRUCTURA TERRITORIAL DA FGA**

**Artigo 108º.**– A FGA estrutúrase territorialmente en Delegacións.

Cada Delegación quedará integrada por Clubes, Atletas, Adestradores e Xuíces que correspondan ao límite xeográfico fixado pola Asemblea Xeral.

**Artigo 109º.**– As Delegacións axustarán a súa actividade ás normas dictadas pola FGA

As Delegacións haberán facilitar á FGA toda a información que esta lle requira sobre as súas actividades.

**Artigo 110º.**– Os Presidentes das Delegacións serán nomeados e cesados polo Presidente da FGA de acordo co Artigo 28º apartado h) dos presentes Estatutos.

A composición do Equipo Directivo e a competencia do mesmo, será libre facultade do Presidente da Delegación.

### **DO RÉXIME ECONÓMICO DAS DELEGACIÓNS**

**Artigo 111º.**– Constituíranse os recursos económicos das Delegacións:

As dotacións económicas que lles asigne a FGA.

**Artigo 112º.**– As Delegacións axustarán a súa actividade económica ao réxime de orzamentos e informarán do mesmo á FGA.

**Artigo 113º.**– A FGA controlará as subvencións e demais recursos económicos que utilicen ou se asignen ás Delegacións.

**Artigo 114º.**– As operacións relativas a retribucións, gastos e pagos, así como as de Contabilidade axustaranse ao establecido pola FGA.